

कलस्सेला वोतुप तेपा कितुपतिवाला पावलकी टिवु यिकी दी थेपकी कोर्ला

दी यिकी ति पावलकी कलस्सेला वोतुप चर्चला टिवु यिन। कलस्सी ति एफिससकी शारकी थाकाला वोतुप एशिया माइनरला वोतुप ग्येसा च्यिक नोक। तेकी चर्च ति पावलकी गो चुवु मिन, यिन्सिनाड ती लुड्बाला तीकी खोरो चेक लावु यिन सिनी नोकिनोक। ती चर्चला शब्ज्यी कितुपला पावलकी एफिसस नेसुर मीतिवा साड ताडनोक। ती पेला ते लेन मेटेड्बु लोपुप गेकेनतिवी कोन्छयोक्ला डो शेवु ताड खो नेसुर तेरी डार ड्येतुपला यम्बा “थुकी ग्येल्बु ताड डारतिवाला” तेन गोकिवी सिनी कर्खाप क्यानोक। तमा ती ताम्डे ति पावलला साड छ्या नोक। तोजो तिराड मिन, यिने ती गेकेनतिवी मीतिवाला यहदी च्येतुप लुक्सु कि गोकिवी, साप समा ताड यम्बा ठिमतिवा तेन गोकिवी सिनी खोपे येन्देन ड्येन ज्यिकिनोक।

ती तप्की पावलकी तुका येन्देन मेटेड्बुतिवी तेन्दोकला टेड्बु ख्रीष्टियानकी येन्देन नेसुर लड गोकिवी सिनी दी यिकी टिवु यिन। तीकी कोर्ला पावलकी दुक सिक्का वे: “तेरी थर्वा ति येशू ख्रीष्टकी नड्गिबी, तमा यम्बा फयानकी ठिमतिवा ताड लुक्सुतिवी मीतिवाला कोन्छयोक् नेसुर थाकिरेड्बु जेवी। ख्रीष्ट नेसुर राड कोन्छयोक्की जम्बुलिड ज्ये नड्गुप यिन, तमा खो नेसुर राड तीला खोरे ओडला ज्याड वे। जम्बुलिडकी मीतिवा तेरीकी ख्रीष्टला तिराड थर्वा नड्गुप यिन सिनी रेवा कि गोकिवी।” पावलकी तेपा कितुपतिवी मिजीला गोवु खक्छ्येवु येन्देनकी कोर्ला साड सिक्का वे।

दी ति ड्याम्ले कि गोवु ताम्डे यिन। दी पावलकी टिवु यिकी ति तुखिकसकी कलस्सीला खुनी गालनोक। तीकी मुला गलुप मी ति ओनेसिमस सिरुप योक्पु नोक। तीकी थोक्ला पावलकी फिलेमोनला दी यिकी टिनोक।

मुला राड वोतुप लोप्च्येनतिवा

दी यिकीकी कोर्ला १:१-८

ख्रीष्टकी च्योलाम ताड लाका १:९-२:१९

ख्रीष्टला वोतुप मिजी सम्बा २:२०-४:६

यिकी टिनी सिन्दा क्यावु ४:७-१८

पावलकी टसी देलेक

1 टसी देलेक! दी यिकी ति कोन्छ्योककी नोवा नेसुर ख्रीष्ट येशूकी लोमा छये
ड पावल ताड नुप तिमोथी नेसुर

2 कलस्सेला देतुप कोन्छ्योकला तेपा कितुप चाड्मा ताड खोड्तेर्मु वोतुप
अच्युनुपतिवाला टिवु यिनो। दाक्पी पपा कोन्छ्योककी खिराडला कटिन ताड
लोदिमु नड्शी।

कोन्छ्योकला थुचिछे पुलनी मोपोर कितुप कोर्ला

3 ड्यिराड खिरा थोक्ला मोपोर कितुप पेला दाक्पी चोवो येशू ख्रीष्टकी पपा
कोन्छ्योकला नरी थुचिछे बुल्गिवी।

4 च्यिलासिसिन खिरा ख्रीष्ट येशूला तेपा क्यावु ताड कोन्छ्योककी चाड्मा
वोतुप मीतिवाला ड्यिड्ज्ये क्यावु ति ड्यिरा थोसुड।

5 तुका तेपा ताड ड्यिड्ज्ये क्यावु ति खिरा थोक्ला देवाच्येनला ज्यकुप
रेवा नेसुर वुड्गुप यिन। ती रेवाकी कोर्ला गोमाला के खिरा सुड टेड्बु वोतुप
कोन्छ्योककी लेन ल्यामु थोवु पेला हाक्को वे।

6 ती लेन ल्यामु ति खिरा ते वा वे। तमा ती ति तेरी जम्बुलिडला फेलनी
डोयी वे। ती दोके क्यानी खिरा कोन्छ्योककी टेड्बु वोतुप कटिनकी ताम्डे थोनी
हाक्कोवु पेला नेज्युनी ती लेन ल्यामुकी खिरा पर्ला लाका कियी वे।

7 दी कोन्छ्योककी कटिन ति ड्यिरा मुला राड शब्ज्यी कितुप दाल्जा इपाफ्रास
नेसुर खिराडला लापुप यिन। ती ति ड्यिरा छापला खिरा पर्ला ख्रीष्टकी थोक्ला
लाका कितुप खोड्तेर्मु वोतुप नुप यिन।

8 तमा कोन्छ्योककी थु चाड्माकी खिराडला नड्गुप ड्यिड्ज्येकी कोर्ला
तीकी ड्यिराडला सिक्यासुड।

9 ती ताम्डे थो नेज्युनी खिरा थोक्ला नरी ड्यिराड कोन्छ्योकला मोपोर कियी
वे। खिराड कोन्छ्योककी थु चाड्माकी च्यु ताड रिक्पा नेसुर खोकी नोवा काड
यिन सिनी ल्यामु हाक्कोशी सिनी ड्यिराड नरी मोपोर कितिन।

10 तुक क्यासिन ख्यिरा चोवोकी सेमला डोप मिजी क्याङ्नी नरी खोला गा लोड थुक्कीवी। तमा ख्यिराड तेरी मड मड लाका ल्यामु कितुप च्युङ्नी कोन्छयोक्की नड्गुप रिक्पाला फरिन डिवी।

11 तमा कोन्छयोक्की मोवा वोतुप डार नेसुर ख्यिराड रम्बु च्युङ्गीवी। तुक क्यासिन ख्यिराड तेरी तामडेला गा क्यानी डेकला देतुप ताड हम क्यानी दे थुक्कीवी।

12 तीकी थोक्ला पपा कोन्छयोक्कला थुचिछे पुल। खोकी ठछयेली वोतुप ग्येल्खापला खोरे चाङ्मा वोतुप मीतिवाला तेरिन सिनी थाक्छयेतुप ति खोकी ख्यिराडला ड्ये छयोवु जो नड वे।

13 खोकी दाक्पुला नक्तोमीकी ओङ्ज्येन ने थर्वा नाङ्नी खोरे ड्येङ्ज्येवु सेवुकी ग्येल्खापला ल्यामो क्यानी क्यल नड वे।

14 ती खोकी सेवुकी राड दाक्पुला दिक्पा ने थर्वा नङ्नी दाक्पी दिक्पातिवा तेरी ता च्यिनी वे।

ख्रीष्ट ति तेरी सिनाड चोछये वे

15 येशू ख्रीष्ट ति दाक्पी मिक्की मोथोङ्गुप कोन्छयोक्की जुजमला वोतुप चोवो यिन। खो ति जम्बुलिडला वोतुप तेरी च्यालकतिवा सिनाड थल्माला वोतुप कोन्छयोक्की सेवु यिन।

16 च्येलासिसिन मिक्की थोङ्गुप ताड मोथोङ्गुप तेरी च्यालकतिवा खो नेसुर राड ज्ये नड्गुप यिन। देवाच्येन ताड जम्बुलिडला वोतुपतिवा ताड ग्येल्ठिकतिवा ताड ग्येला कितुप ओडतिवा ताड ठिम कितुप डारतिवा ताड ओङ्ज्येनतिवा ताड तेरी च्यालकतिवा खो नेसुर राड खोरे थोक्ला ज्ये नड्गुप यिन।

17 ख्रीष्ट ति तेरी च्यालकतिवा सिनाड गोमाला ज्यु वोतुप यिन। तमा तेरी च्यालकतिवा खोला राड ग्येनी देन वे।

18 चर्च ति जु यिन्सिन खो ति चर्चकी गो चोछयेवु यिन। खो ति थल्मा नेज्यु वोतुप चोवो यिन, शेषतिवी पर नेमा तेरी सिनाड गोमाला डोसु लावु ति खो राड यिन। तुक क्यानी तेरीकी खला खो ति चोछये वे।

19 कोन्छयोक्की नोवाकी राड ख्रीष्ट ति खो ताड च्यिक्पा राड क्यानी ज्युवु गा लासुड।

20 तमा ख्रीष्ट ग्यङ्गिशडला टुङ्नी तेन्दुप ठक नेसुर लोदिमु नङ्नी खोकी जम्बुलिड ताड देवाच्येनकी तेरी च्यालकतिवा खोरे मुला डिक्सुड।

21 तोइला याड ख्यिराड लाका दुक्टा क्यानी कोन्छयोक नेसुर थाकिरेड्बु गल्नी ख्यिरा सेम ति खोकी तेन्दोकला लानी डला गल वोतुपजा।

22 यिने त याड खोकी थोइदाडला चाइमा ताड मडी मेतुप ताड क्येन मेतुप जोपला येशू ख्रीष्ट टुइनी खोकी ख्यिराड ताड मुला डिक्सुड।

23 तुक कितुपला वुतुड के ख्यिराड तेपाला येर मर माक्यानी नरी डेकला दे गोकिवी। तमा ख्यिरा थोवु लेन ल्यामुला रेवा क्यावु ति क्युनी माज्योक। ती लेन ल्यामु ति देवाच्येनकी वोक्ला वोतुप तेरी मीतिवाला ख्याप्टाक क्यावु यिन। ड पावल साड ती लेन ल्यामु ख्याप्टाक कितुप लावा च्युड वे।

चर्चकी थोक्ला पावलकी टेमु क्यावु

24 त याड ड ख्यिरा थोक्ला दुक्पा खुस्पला गा कितिन। तमा ख्रीष्टकी जु यिन्दुप चर्चकी थोक्ला खुर गोवु दुक्पा ताड छेटाड ति डे जुला खुनी तेरी कितिन।

25 कोन्छयोककी ख्यिराडला खोकी सुड तेरी छासे ल्यामु क्यानी हाक्को ज्यितुपला खोकी डला चेक तेन नङ्गुप तप्की ड ति चर्चला शब्ज्यी कितुप लावा च्युड्सुड।

26 ती सुड ति कल्वा कल्वा ताड पगावा हङ्गावी डो नेज्युनी छयाकला वोतुप ताम्डे यिन, यिने त याड खोकी तीकी तेन्दोक ति खोरे चाइमा वोतुप मीतिवाला ठछ्येली हाक्को च्यिनी वे।

27 तमा खोकी यहदी मिन्दुप मिरिक यम्बाकी मीतिवी पर्ला ती छयाकला वोतुप मोवा ति छासे हलेवु वे सिस्प ताम्डे ति खोरे मीतिवाला हाक्को ज्यितुपला पेन नङ्गुप यिन। ती छयाककी ताम्डे ति ख्यिरा मिजीला वोतुप ख्रीष्ट यिन। ख्रीष्ट ख्यिरा मिजीला वोतुप तप्की ख्यिराडला मोवा वोतुप रेवा ड्येनी वे।

28 ड्यिराड दी ख्रीष्टकी कोर्ला मीतिवा तेरीला ख्याप्टाक कितिन। तमा तेरीकी ख्रीष्टला तेपा रम्बु क्यानी कोन्छयोककी थोइदाडला ल्यामु वोतुप जोपला ड्यिराडला वोतुप तेरी रिक्पा नेसुर तिवा रे रेला टोइगु ताड येन्देन तेर्किवी।

29 ख्रीष्टकी डे सेमगी दिइला डार नङ्गुप तप्की राड ड दी लाका ति छासे टेमु क्यानी कितिन।

2

1 वुतुड के डे याड ख्यिराड ताड लाउडिकियाला वोतुप मीतिवा ताड डला

डो माशेवृतिवा तेरीकी थोकला छासे टेमु क्यानी लाका क्या वे सिस्प ति ख्यिराडला हाक्कोशी सिस्प डे नोवा वे।

2 डे तुक क्यावु ति ख्यिराड ताड तिवी सेमला डाडेड इयेनी च्यिककी च्यिकला ड्रियेड्ज्ये किशी सिनी यिन। तुक क्यासिन वुतुड के ख्यिराड तेरीकी सुड टेड्बु हाक्कोनी सेमला तेन्तेन तेपा क्यानी कोन्छयोक्की छयाकला वोतुप ख्रीष्टला ल्यामु क्यानी डो शे थुक्किवी।

3 ख्रीष्टला राड कोन्छयोक्की तेरी येन्देन ताड रिक्पा ति बानी ज्यकुप टोड्बा दोके क्यानी ज्याक्नी वे।

4 डे दी ताम्डे सिक्पावु ति सी साड ख्यिराडला ताम्डे टेड्बु वोतुप दोके जिनोक जोनी मुलुशी सिनी यिन।

5 ड ख्यिरा पर्ला मेसिनाड डे सेम ति ख्यिरा पर्ला राड वे। ख्यिराड येर मर माक्यानी ख्रीष्टला तेपा क्यानी डेकला देतुप ति ल्हानी ड गा कितिन।

ख्रीष्टकी मिजी नेसुर थर्वा

6 येशू ख्रीष्टला डे चोवो यिन सिनी ख्यिरा सेमला लावु तप्की ख्यिराड नरी खोकी सुडला इयेन्नी मिजी क्योड।

7 तमा दोड्बी मार तिड्मु क्यड्नी नाम्साड तला मग्यकुप रम्बु वोतुप दोके ख्यिराडला लापुप येन्देनला तेपा रम्बु क्यानी खोला नरी थुचिछे पुल।

8 ख्यिराड च्याड्से देता! सी साड खोपे च्यु ताड रिक्पा नेसुर जिनोक जोवु ताम्डेतिवा लाप्नी ख्यिराडला मुलुशिता। तुका ताम्डेतिवा ख्रीष्ट नेमा वावु मिन, यिने मीतिवी लक्सु ताड जम्बुलिडला वोतुप डार नेसुर वावु यिन।

9 च्यिलासिसिन कोन्छयोक्कला वोतुप तेरी छाछिडी ति ख्रीष्टकी मुला राड ज्यु वे।

10 तमा ख्यिरा खोला तेपा क्यावु तप्की खोला वोतुप तेरी किताड नालुतिवा ति ख्यिरा मिजीला थोप्नी वे। खो ति तेरी ओड्ज्येन ताड डारतिवी खला चोछ्ये वे।

11 ख्यिराड खोला तेपा क्यानी यहदी च्येतुप लक्सु क्यावु यिन। ती च्येतुप लक्सु ति मी लाक्पी क्यावु मिन, ख्रीष्ट नेमा राड च्युड्गुप यिन। ती ति ख्यिराडला वोतुप दिक्पाकी किताड नालु क्युस्प यिन।

12 बप्तिस्मा लड्गुप पेला ख्यिराड ख्रीष्टकी मुला राड मुक्तुम ग्यपुप दोके यिन। तमा ख्रीष्टला शेप ने डोसु लोड्गुप कोन्छयोक्की डारला ख्यिरा तेपा क्यावु तप्की ख्यिराड साड ख्रीष्टकी मुला सेन्बु लानी वे।

13 खिरा दिक्पा क्यावु ताड दुक्टा कितुप किताड नालु माक्युस्रुप तप्की थेड्मा यी खिराड शिनी वोतुप्जा, यिने त याड कोन्छयोककी ख्रीष्टकी मुला राड खिराडला सेन्बु लाड वे। तमा खिरा तेरी दिक्पातिवा ता च्यिनी वे।

14 तीकी तेन्दोक ति खोकी दाक्पुला क्येन फोकुप दाक्पी क्यावु दिक्पी थोक्ला टिवु यिकीतिवा तेरी ख्रीष्टकी मुला राड ग्यडिशडला काँडी दाप्नी ना ताड्सुड।

15 ती ग्यडिशड लोला राड डेतिवी ओड्ज्येनतिवा ताड डारतिवाला ना ताड्नी तिवी खला खोकी ग्येल्सुड। तमा मीतिवी मिड्गाला तिवाला छया तेन्नी डोशी मारे जोसुड।

16 तुक क्यानी सी साड खिराडला साप थुड्गुप ताड चाड्मा वोतुप ड्रियमा तेन्दुप ताड छेवा च्यिक तेन्दुप ताड डसोप ड्रियमा तेन्दुप ताम्डेकी कोर्ला क्येन मग्यक्शी।

17 ती तेरी ताम्डेतिवा ज्यक्ला वुड्गुप ताम्डेकी र्हिप्च्याड तिराड यिन, यिने वुतुड्की ति ख्रीष्ट राड यिन।

18 ड्रियरा ज्यल्का थोड्गुप यिन सिनी मी यम्बाला छया देन्दुपला कुसु ज्यम्बु जोप दुक्टातिवा ताड देवाच्येनकी लेन क्योलुप थुला तेन्दुप मीतिवा सी साड खिराडला थोपुप छयक्तक तोर्नी डोप मोजोशी। तिवा ति सेम दुक्टा नेसुर तेन्दोक मेताला ड राड छये यिन सिनी सिवी,

19 तमा ख्रीष्ट ताड मुला तम्जी माजोनी कुतुक देकिवी। यिने ख्रीष्टकी ओडला देसिन तीकी तेरी जु ति थिन्जाम ताड चतिवा टेक टेक थिनी ख्रीष्टकी डार नेसुर कोन्छयोककी नोवाला वोतुप दोके फेलिन डिवी।

ख्रीष्टकी मुला शिनी सेन्बु लड्गुप कोर्ला

20 खिराड याड ख्रीष्टकी मुला राड शिनी दी जम्बुलिडला ओड्ज्येन क्यावु ठिम नेसुर थनी वे। यिन्सिनाड च्यिला दी जम्बुलिडकी ठिमला वोतुप मीतिवी दोके मिजी क्योड्गिवावी?

21 च्यिला खिराड “दीला जिम्बुप मेवी, तीकी टोवा ल्हाप मेवी, तीला थो तोड्गुप मेवी।” सिस्म ठिमतिवाला तेन्निवी?

22 ती तेरी ठिमतिवा थोकिन थोकिन ना डिवी। तिवा ति मीतिवी जोवु ठिम ताड येन्देनतिवा तिराड यिन।

23 तिवा ति खोपे जोवु छयोला टेङ्बु कितुप ताड कुसु ज्यम्बु कितुप ताड खोरो जुला डेकला ज्योकुपला छासे रिक्पा वोतुप दोके थोङ्गिबी, यिने तिवा ति नासाम दुकटाला खोरो ओडला ज्योकुपला काड साड फेन मोथोवु वे।

3

1 ख्यिराड ख्रीष्टकी मुला राड सेन्बु लङ्गुप तप्की येर देवाच्येनकी ताम्डेतिवाला नासाम तोड। ते देवाच्येनला ख्रीष्ट कोन्छयोककी यावी थाकाला ज्युकिवी।

2 तुक क्यानी ख्यिराड जम्बुलिडकी ताम्डेला मिन, येर देवाच्येनकी ताम्डेला नासाम तोड।

3 च्यिलासिसिन ख्यिराड शिनी वे, तमा ख्यिरा मिजी ति ख्रीष्टकी मुला राड कोन्छयोककी चिप्ला बानी ज्याड वे।

4 ख्यिरा मिजी ति ख्रीष्ट यिन। खो फेपुप तुजेला ख्यिराड साड खोकी मुला राड खोकी मोवाला वुङ्गुप थोङ्गितो।

मिजी इयिङ्बा ताड सम्बा

5 तुक क्यानी ख्यिरा जम्बुलिडकी मिजीला वोतुप नोवातिवा तेरी क्युर। ती नोवातिवा ति शम्डेन कितुप ताड छ्येवु कितुप ताड चोताम लपुप ताड नासाम मेलोवा तोङ्गुप ताड देर्पा कितुप यिन। देर्पा कितुप ति कुला छयो तङ्गुप दोके यिन।

6 ती ताम्डेतिवी जोसालोन्सिन कोन्छयोककी पर्च्या ति खोकी कला मेङ्गेन्दुपतिवाला ख्येलिगीवी।

7 गोमाला थेङ्मा यी ख्यिरा मिजी साड तुकै राड वोतुपजा। तमा तुक राड क्यानी युवु साड यिन्दुपजा।

8 यिने त याड ख्यिरा मिजी नेसुर ती तेरी डियर्मु कितुप ताड डियर्मु कोक्पु वोतुप ताड डियिङ्मर कितुप ताड मारे तोङ्गुप ताड ताम्डे मेलोवा लपुप ति ख्यिरा ख नेमा क्युर गोकिवी।

9 ख्यिराड च्यिककी च्यिकला जिनोक माजो। च्यिलासिसिन ख्यिरा रङ्गी मिजी इयिङ्बा ताड तीला वोतुप किताड नालुतिवा तेरी क्युनी

10 ख्यिरा रङ्गी मिजी सम्बा फोनी वे। तुक क्यानी ख्यिराड जो नङ्गुप कोन्छयोककी ख्यिरा मिजी साड खोकी किताड नालु दोके मड मड सम्बा जो नङ्गिगी। तमा ख्यिरा खोकी रिक्पाकी कोर्ला ल्यामो क्यानी हाक्कोकिवी।

11 कोन्छयोककी मिजी सम्बा जो नङ्गुप तप्की दे याड ग्रीक ताड यहदी, च्येतुप लुकसु क्यावु ताड च्येतुप लुकसु माक्यावु, छियग्यपकी मी ताड च्योला म ल्यामु मेतुप मी, योक्पु ताड योक्पु मिन्दुप मीतिवी पर्ला काड साड ख्ये मे। यिने ख्रीष्ट तिराड तेरी सिनाड खक्छयेवु वे, तमा खो ति तेरी मीतिवी मुला ज्यु वे।

12 ख्यिराड कोन्छयोककी पेन नङ्गुप खोकी ड्यिङ्ज्येवु ताड टेड्बु वोतुप मी यिन्दुप तप्की च्यङ्च्यु सेम्बा ताड च्यम्बा कितुप ताड खोरुडला मो बेपुप ताड कुसु ज्यम्बु ताड हम क्या देतुप वुड गोकिवी।

13 मी ललाइकी ख्यिरा तेन्दोकला लानी काड रे च्यिक रे तामडे क्यासिन ख्यिराड च्यिककी च्यिकला हम क्यानी तीला माफ बिन। चोवोकी ख्यिराडला माफ नङ्गुप दोके ख्यिरा साड माफ तेर गोकिवी।

14 दी तेरी सिनाड मड खक्छयेवुला ख्यिराड च्यिककी च्यिकला ड्यिङ्ज्ये की। ख्यिराड च्यिककी च्यिकला ड्यिङ्ज्ये क्यासिन ख्यिरा तेरी सेम ति वुतुड के च्यिकपा राड च्युङ्गिगी।

15 ख्रीष्टकी ख्यिराडला लोदिमु नङ्गुप तप्की ख्यिराड च्यिककी च्यिकला नरी ड्यिङ्ज्ये की। च्यिलासिसिन ख्यिराड च्यिककी च्यिकला लोदिमु क्यानी सेम थिन्नी देतुपला राड कोन्छयोककी ख्यिराडला कताड नङ्गुप यिन। तीकी थोक्ला ख्यिरा खोला थुचिछे पुल।

16 ख्रीष्टकी सुड ति छासे क्यानी ख्यिरा सेमला नरी लुशी। तमा तेरी च्यु ताड रिक्पाकी च्यिककी च्यिकला लोपुप ताड टोङ्गु बिन। कोन्छयोकला सोवा देकुप लुतिवा ताड कोन्छयोककी थु चाङ्माकी नङ्गुप लुतिवा लानी सेमगी दिड नेज्युनी कोन्छयोकला थुचिछे पुल।

17 तमा ख्यिरा तामडे ताड लाका काड क्यासिनाड चोवो येशूकी मिडला किसान। खो नेसर राड पपा कोन्छयोकला थुचिछे पुल।

तेपा कितुप मिछाडतिवाला टोङ्गु

18 पेमीतिवा, ख्यिरा रडगी ख्योवातिवी सिक्पावु खला ड्येन। तुक कितुप ति चोवोला तेपा कितुप मीतिवी कि गोवु यिन।

19 ख्योवातिवा, ख्यिरा रडगी पेमीतिवाला च्युक्खु माक्यानी ड्यिङ्ज्ये किसान।

20 आडातिवा, ख्यिरा नरी रडगी पपाआमी सिक्पावु खला ड्येना। तुक क्यासिन चोवो येशूला गा लङ्गिगी।

21 तमा पपातिवा, ख्यिरा रडगी पेजातिवाला ड्यिर्मु मालोड। तुक क्यासिन तिवी सेम शिवी।

22 लावातिवा, ख्यिराड दी जम्बुलिडकी रडगी ज्यिन्दाकतिवी सिक्वावु खला ड्येना। तिवाला गा लोड्गुप नोनी तिराड तिवी थोड्दाडला लाका माकी, यिने चोवोला ज्यिवा खुनी सेम टेड्बुकी लाका की।

23 ख्यिरा काड किसिनाड मी थोक्ला क्यावु दोके मिन, यिने चोवोला क्यावु दोके सेमगी दिड नेज्युनी लाका किसा।

24 नासाम तोड, चोवोकी ख्यिराडला थाक्छयेन नड्गुप छयक्तक नड्गिबी सिस्प ति छ्या राड वे। चोवो येशू ख्रीष्ट ख्यिरा ज्यिन्दाक यिन। ख्यिरा खोला राड शब्ज्यी कियी वे।

25 लाका मेलोवा कित्प सु यिन्सिनाड तीला पचर्या मेलोवा राड फोकिवी। चोवोकी सुला साड ख्ये मेबेवी।

4

1 ज्यिन्दाकतिवा, ख्यिरा साड देवाच्येनला रडगी ज्यिन्दाक वे सिस्प ति हाक्कोनी रडगी लावातिवाला ख्ये मापेवा क्यानी टेड्बु किसा।

टोड्गु यम्बा

2 ख्यिराड नरी मोपोर क्या क्यावा देता। मोपोर कित्प पेला चेर्मु क्यानी थुचिछे पुलनी मोपोर किसा।

3 तमा ड्यिरा थोक्ला साड मोपोर किसा। कोन्छयोककी सुड ख्याप्ताक कित्पला खोकी दाक्पी थोक्ला गो पेनी ख्रीष्टकी छयाकला वोत्प तामडेतिवा ख्याप्ताक कि थुप्शी। तीकी थोक्ला राड ड चोन्खाडला शोनी वे।

4 तमा कि थुपा सेक ल्यामो क्यानी ती सुड ति डे ख्याप्ताक कि थुप्शी सिनी तीकी थोक्ला ख्यिरा मोपोर किटे किसा।

5 तेपा मिक्वितीवी मुला किताड नालु कित्प पेला कोन्छयोककी नड्गुप रिक्पा नेसुर किसा। तमा ख्यिराडला थोपुप तुजेला तेरी ल्यामु क्यानी लाका किसा।

6 छे टोवाकी समा शिम्बु जोवु दोके ख्यिरा तामडे लप्ताड ति नरी कटिन नेसुर वुड गोकिवी। तुक क्यासिन सी ख्यिराडला टिवा टिसिनाड ख्यिरा तिवाला ल्यामु क्यानी टिलेन तेर थुक्किवी।

तिड्मी टसी देलेक

7 दाकपी नुप तुखिकसकी राड डे कोर्ला तेरी लेन ति ख्यिराडला लफ्कितो। ती ति डे ड्यिङ्ज्येवु नुप यिन, तमा डे मुला राड चोवोला शब्ज्यी कितुप खोड्तेर्मु वोतुप मी यिन।

8 डे तीला ख्यिरा ते तोङ्गुप तेन्दोक ति तीकी ड्यिरा कोर्ला ख्यिराडला ल्यामो हाक्को ज्यितुप ताड ख्यिरा सेमला डाडेड तेम्पला यिन।

9 तीकी मुला ड्यिरा ड्यिङ्ज्येवु ताड खोड्तेर्मु वोतुप नुप ओनेसिमस साड बुड्यिन वोतो। ती ति ख्यिरा मु नेसुर राड वावु मी यिनो। दे च्युङ्गुप ताम्डेतिवा तिबी राड तेरी ख्यिराडला लफ्कितो।

10 ड ताड मुला राड चोन्खाडला वोतुप अरिस्ताख्सकी साड ख्यिराडला टसी देलेक सिनी तड वोतो। तमा बारनाबासकी नुप मर्कूसकी साड ख्यिराडला टसी देलेक सिनी तड वोतो। ती मर्कूसकी कोर्ला गोमाला साड डे ख्यिराडला सिक्क्यायिनो। ती ख्यिरा ते वासिमा तीला ल्यामो क्यानी गासो शुसा।

11 युस्तस सिम्प येशूकी साड ख्यिराडला टसी देलेक सिनी तड वोतो। यहदीतिवी पर्ला तिवा ति कोन्छ्योककी ग्येल्खापकी थोक्ला डे मुला राड लाका कितुपतिवा यिन। वुतुड के तिबी डला छासे टोङ्गु बिन्सुड।

12 ख्यिरा मु नेसुर वावु इपाफ्रासकी ख्यिराडला टसी देलेक सिनी तड वोतो। ती ति येशू ख्रीष्टकी थोक्ला शब्ज्यी कितुप मी यिन। तीकी ख्यिराड तेपा रम्बु ताड डेकला देनी कोन्छ्योककी नोवा ति काड यिन सिनी तेन्तेन हाक्को थुप्पी सिनी नरी ख्यिरा थोक्ला मोपोर क्या क्यावा देकिवी।

13 ड तीकी थोक्ला पड्बु तेरिन, तीकी वुतुड के ख्यिराड ताड लाउडिकिया ताड हिरापोलिसला वोतुप मीतिवी थोक्ला छासे टेमु क्या वे।

14 ड्यिरा ड्यिङ्ज्येवु आम्ज्यी लूका ताड डेमासकी ख्यिराडला टसी देलेक सिनी तड वोतो।

15 लाउडिकियाला वोतुप नुपतिवा ताड नुम्फास ताड तीकी खाड्बा जोम्बुप चर्चकी मीतिवाला ड्यिरा छ्योक नेसुर टसी देलेक सिनी सिसा।

16 दी यिकी ति ख्यिरा रानी सिन्सिमा लाउडिकियाला वोतुप चर्चला साड रोक च्यिता। तुक राड क्यानी लाउडिकियाकी चर्च नेसुर वावु यिकी साड ख्यिरा रोसा।

17 तमा “चोवोकी नङ्गुप लाका ति तेरी डुप राड गोकिवी।” सिनी अर्खिप्पसला सिसा।

18 ड पावलकी छ्योक नेमा ख्यिराडला टसी देलेक वोतो। दी टसी देलेक सिक्क्यावु ति डे लाक्पी राड टिवु यिनो। ड चोन्खाडला शोनी च्याटोक ग्यपुप ति

खिरा टोक माज्येता। कोन्छयोक्की कटिन ति खिरा मुला लुशी।

कोन्छ्योककी सुड

Sherpa: कोन्छ्योककी सुड New Testament

copyright © 2014 Wycliffe Bible Translators, Inc.

Language: (Sherpa)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source files
dated 29 Jan 2022

b834b297-b0c6-512e-bce6-f4d9b41b94be